



Udhëzime për Edukimin e Bijave

nga

Shejkh 'Ali Jahja el-Haddadij





Disa fjalë rreth Autorit

Ai është dijetari i nderuar, ‘Ali Ibn Jahja Ibn ‘Ali Ibn Muhamed el-‘Amirij el-Haddadij. Ka lindur në qytetin e Rrijadit më 3/10/1390 Hixhrij (1970 Miladij). Shkollën fillore e kreu në medresenë “Mbreti ‘Abdul-‘Azizj” në Rrijad më 1402 Hixhrij. Shkollën e mesme e kreu në Institutin e Diturisë në Rrijad më 1408 Hixhrij. Pastaj ka mbaruar studimet e larta në Universitetin Islamik “el-Imam Muhamed Ibn Su’ud”, fakulteti Usul ed-Dijn, dega Suneti dhe Shkencat e tij. Pastaj kreu studimet e magjistraturës në Universitetin “Mbreti Su’ud”, Fakulteti i Edukimit, dega Hadithi dhe Tefsiri. Titullin e doktoraturës e mori në Universitetin Islamik “Emderman”, në fakultetin e “Usul-Dinit”, dega e Sunetit dhe Shkencave të Hadithit.

Ka ushtruar një sërë detyrash zyrtare, prej të cilave:

- 1 - Mësues në fakultetin e “Usul-Dinit”, dega e Sunetit dhe Shkencave të tij, në Universitetin Islamik “Muhamed Ibn Su’ud”.
- 2 - Imam dhe Hatib në Xhaminë e madhe “Ummul-Mu`minine A’isheh Bint Ebij Bekr” në Rrijad.

Prej dijetarëve tek të cilët ka mësuar Shejkh ‘Ali el-Hadadij përmendim:

- 1 - Shejkh ‘Abdul-‘Azizj Ibn Baz (*rahimehullah*).
- 2 - Shejkh ‘Abdullah Ibn ‘Akijl (*rahimehullah*).
- 3 - Shejkh Salih Ibn Feuzan el-Feuzan (*hafidhahullah*).

4 – Shejkh Ahmed Ibn Jahja en-Nexhmij (*rahimehullah*).

5 – Shejkh Zejd Ibn Muhamed Ibn Hadij el-Medkhalij (*hafidhahullah*).

Ai ka marrë ixhaze (leje transmetimi) nga një numër dijetarësh eminentë, prej të cilëve:

1 – Shejkh Hasen Hammad, nga i cili ka marrë ixhaze në Kur'an.

2 – Shejkh ‘Abdullah Ibn ‘Akijl (*rahimehullah*).

3 – Shejkh Ahmed en-Nexhmij (*rahimehullah*).

4 – Shejkh Isma’il el-Ensarij (*rahimehullah*).

5 – Shejkh Jahja el-Muderris (*hafidhahullah*).

6 – Shejkh Uasiullah ‘Abbas (*hafidhahullah*).

Prej aktivitetit dhe kontributit të tij në fushën akademike dhe në davet përmendim:

1 – Ka shkruajtur një numër artikujsh të cilat janë publikuar në gazetatat “*er-Rrijad*”, “*el-Xhezirah*”, “*Ukadh*” dhe në revistën “*el-Xhundijul-Muslim*”.

2 – Ka marrë pjesë në disa kurse intensive verore (*Deurat ‘Ilmijeh Selefijjeh*) në Rrijad, në Samitah, në Ta`if, në Khamijs Mushijt, në Hafr el-Batin, në Mekkeh etj.

3 - Ka disa libra të botuar, prej të cilëve: “*el-Guluu ue Medhahiruhu fij el-Hajat el-Mu’asirah* - **Ekstremizmi dhe Manifestimet e tij në jetën bashkëkohore**”; “*el-Erbe’une fij Medh`heb es-Selef* - **40 Hadithe rreth Medh`hebit të Selefëve**”; “*Safehat Muhimmeh min Hajat Sejjid Kutb* - **Fragmente të rëndësishme nga jeta e Sejjid Kutbit**”; “*Takhrijb la Takrijb: Fusul min Akijdeti er-Rrafidah Mehdatun ila Du’at et-Takrijb* - **Ky është shkatërrim e jo afrim: Kapituj nga Akideja e Rrafidave, dhuratë për atë që thërrasin për bashkim**”; fletëpalosja me titull “*Risaleh ‘Akhileh ila Raxhul el-Emn es-Sa’udij* - **Mesazh Urgjent për Forcat Saudite të Sigurisë**”.

Dhe Allahu e di më së miri.

Lavdërimet dhe bekimet e Allahut qofshin mbi robin dhe të Dërguarin e Tij, Muhamedin, si dhe mbi Familjen e tij, mbi Shokët e tij dhe mbi të gjithë ata që i pasojnë me mirësi deri në Ditën e Gjykimit.



Hyrje

E gjithë lavdia i takon Allahut të Vetëm, lavdërimi dhe bekimi qoftë mbi Robin dhe të Dërguarin e Tij Muhamed, si dhe mbi Familjen dhe Shokët e tij.

E më pas:

Lexues të nderuar, gjithësecili prej jush ka për t’u ringjallur nga Zoti i tij pas vdekjes dhe do të merret në pyetje e në llogari për ato që punoi gjatë jetës së tij në këtë dynja. Dhe prej çështjeve që do të merret në pyetje robi është familja dhe fëmija e tij, si i rriti e si i edukoi ata. Për këtë arsye, thotë Pejgamberi (sal-lAllahu ‘alejhi ue sel-lem):

الرجل راع في أهل بيته ومسؤول عن رعيته، والمرأة راعية في بيت زوجها ومسؤولة عن رعيتها.

“Burri është bariu i njerëzve të shtëpisë së tij dhe përgjegjës për mbarëvajtjen e tyre; kurse gruaja është bareshë në shtëpinë e burrit të saj dhe përgjegjëse për të...”

Hadithet që flasin për edukimin e fëmijëve janë të shumta, mirëpo unë do të mjaftohem në këtë temë veçse me hadithet që flasin rreth edukimit të vajzave, për shkak të rëndësisë shumë të madhe që kanë ato, si dhe për shkak të ndikimit të jashtëzakonshëm që ato kanë në moralin dhe sjelljen e shoqërisë. Kjo ngaqë vajza nëse rritet bëhet bashkëshorte, bëhet nënë, bëhet mësuese dhe merr mbi krye role të tjera të rëndësishme në jetë. Prandaj, nëse ajo rregullohet, atëherë do të rregullohen shumë gjëra; e nëse prishet, atëherë do të prishen shumë gjëra.

Përmbajtja e kësaj eseje të shkurtër përmbledh këto pika:

- ① – Vlera e vajzave dhe dhënia fund përbuzjes së tyre në kohën e Xhahilijetit.
- ② – Udhëzime dhe aspekte rreth përkujdesjes ndaj vajzave.
- ③ – Masat mbrojtëse nga rreziqet e kësaj kohe.



Ulera e vajzave dhe dhënia fund përbuzjes së tyre në kohën e Xhahilijetit

Nëse do të shohim Librin e Allahut, do të gjejmë se ai i poshtëron njerëzit e Xhahilijetit (periudhës Para-Islame), ngase njeriu nuk duronte dot kur lajmërohej se ishte bërë me vajzë, zymtësia pllakoste fytyrën e tij dhe ai kaplohej nga pikëllimi. Pastaj atij i vjen turp nga populli i tij dhe kështu largohet prej tyre i turpëruar. Atëherë, ai i flet vetes: a ta varrosë atë për së gjalli, apo ta mbajë atë me turp? Prandaj Allahu i ka poshtëruar dhe i ka turpëruar ata për atë që bënin.

Dhe këto ndjenja të Xhahilijetit vazhdojnë të jenë të gjalla në zemrat e disa njerëzve, sidomos kur gruaja e tij lind shumë vajza, ndonëse gruaja është sikurse toka në të cilën mbin ajo farë që mbjell në të bujku. Madje gjendja e disa prej tyre mund të arrijë deri në atë pikë sa gruaja e ndërpret shtatzaninë e saj. Allahu na ruajt nga injoranca dhe ngurtësia.

Vërtet, në Xhahilijet njerëzit e konsideronin gruan të pavlerë, aq sa njeriu e varroste për së gjalli vajzën e tij, ndërsa rriste qenin dhe përkujdesej për bagëtitë e tij. Por, Allahu e çrrënjosi këtë mendim përçmues dhe e ngriti lart pozitën e gruas duke e vendosur atë në pozitën që i takon, që njeriu t’i respektojë të drejtat e saj dhe ajo të mbajë mbi krye detyrat e saj. Kështu, Ai i drejtohet gruas ashtu siç i drejtohet burrit për sa i përket urdhëresave dhe ndalesave, si dhe e veçoi atë me dispozita të cilat i përshtaten vetëm natyrës së saj femërore.

S’ka dyshim se lindja është një çështje e lidhur me Kaderin, caktimi i saj është në Dorën e Allahut; Ai i dhuron vajza kujt të dojë, i dhuron djem kujt të dojë, disa të tjerëve u dhuron djem e vajza bashkë, kurse disa të tjerë i lë pa trashëgimtarë.

يَهَبُ لِمَن يَشَاءُ إِنثًا وَيَهَبُ لِمَن يَشَاءُ الذَّكَورَ
أَوْ يَزْوِجُهُمْ ذُكْرَانًا وَإِنثًا وَيَجْعَلُ مَن يَشَاءُ عَاقِبَةً

“Ai i dhuron vajza kujt të dojë e djem kujt të dojë. Disave u dhuron të dyja gjinitë: djem e vajza; e, kë të dojë e lë pa fëmijë.”¹

Medito tek ky ajet, shiko si Allahu i ka përmendur femrat përpara meshkujve dhe meshkujt i ka përmendur pas tyre, duke refuzuar në këtë mënyrë ata që e përbuznin vlerën e femrave, e përçmonin rëndësinë e tyre dhe e konsideronin të pavlerë.

Andaj, kënaqu me atë që të ka dhënë Allahu për pjesë sepse me të vërtetë ti nuk e di ku është mirësia. Sa baballarë janë gëzuar ditën kur u ka ardhur lajmi i lindjes së djalit, por më pas ai ka qenë krejt i padobishëm për të, u bë shkak që ia nxiu jetën dhe ia zgjati marazin dhe hidhërimin atij. Dhe sa baballarë janë pezmatuar ditën kur u ka ardhur lajmi se u ka lindur vajzë, ndërkohë që prisnin djalë. Dhe bëhet kjo vajzë e dhembstur, me zemër të mëshirëshme dhe u bëhet krahë në halle dhe fatkeqësi.

Dhe prej këtu arrijmë të kuptojmë se kënaqësia e syve në të vërtetë nuk është në lindjen e djalit apo të vajzës porse kënaqësia arrihet nëse pasardhësit janë të devotshëm, të mirë, qofshin meshkuj apo femra. Ka thënë i Lartësuar duke përshtatur robërit e të Gjithëmëshirëshmit:

¹ Esh-Shuura, 49-50.

وَالَّذِينَ يَقُولُونَ رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ

وَأَجْعَلْنَا لِلْمُتَّقِينَ إِمَامًا ﴿٧٤﴾

“Edhe ata të cilët thonë: “Zoti ynë! Na dhuro neve nga gratë tona dhe fëmijët tanë të atillë që të jenë kënaqësia e syve tanë dhe na bëj prijës dhe shembull i mirë për të devotshmit.””²



² El-Furkan, 74.

Udhëzime dhe aspekte rreth përkujdesjes ndaj vajzave

Vëlla Musliman:

Nëse Allahu të ka dhënë rrizk vajza, atëherë edukoi ato, shpenzo për to dhe sillu me to sa më mirë, duke shpresuar me këtë shpërblim nga Allahu i Lartësuar. A e di ti çfarë shpërblimi ke tek Allahu nëse e bën këtë? Me të vërtetë, nëse e bën këtë do të jesh në Ahiret me Pejgamberin (sal-lAllahu ‘alejhi ue sel-lem).

Ai (sal-lAllahu ‘alejhi ue sel-lem) ka thënë në hadith:

” من عال جاريتين حتى تبلغا جاء يوم القيامة أنا وهو ” وضم أصابعه

“Kush përkujdeset për dy vajza – dmth. dy bija – derisa të rriten, ai do të vijë Ditën e Kijametit dhe unë me të do të jemi kështu” – dhe bashkoi gishtat e tij (‘alejhis-salatu ues-selam). Transmetuar nga Muslimi.

Dhe ai (sal-lAllahu ‘alejhi ue sel-lem) ka thënë:

من ابتلي من هذه البنات بشيء فأحسن إليهن كن له ستراً من النار.

“Kush sprovohet nga këto bija me diçka, dhe ai sillet mirë me to, ato do të jenë mburojë për të nga Zjarri.” Transmetuar nga Bukhari dhe Muslimi.

Dhe bamirësia ndaj bijave ndodh në mjaft çështje, prej tyre:

1 – Zgjedhja e një nëne të mirë, dhe ky është aspekti i parë i bamirësisë për pasardhësit, sepse po të jetë nëna e mirë, e drejtë, e pastër, rrjedhimisht ashtu do të jenë edhe fëmijët e saj – insha` Allah. E sa pasardhës i ka ruajtur Allahu si rezultat i mirësisë, pastërtisë dhe drejtësisë së prindërve të tyre.

2 – Zgjedhja e një emri të mirë, ngase emri do të ketë gjurmë tek njeriu që do të thirret me atë emër. Dhe emrat janë të ndryshëm; prej tyre ka të mirë, prej tyre ka të urryer dhe prej tyre ka emra të cilët janë harram. Dhe sot shumica e njerëzve kanë filluar të kërkojnë emra të rinj pa marrë parasysh kuptimet e tyre apo gjykimet që kanë ato emra. E sa vajza kanë emra të cilat mbajnë kuptime të këqija? Sa vajza kanë emra të huaj ndërkohë që të dy prindërt e saj janë Arabë dhe ata jetojnë në një vend Arab?

3 – Plotësimi i nevojave trupore, siç është ushqimi, veshmbathja dhe ilaçet mjekësore. Përkujdesja për këto gjëra është një prej shkaqeve të hyrjes në Xhenet. Me të vërtetë, një grua hyri tek A’ishah (radij-Allahu ‘anha) dhe me vete kishte dy bijat e saj. Ajo grua ishte e varfër dhe e uritur. Tha A’ishah: “Ajo kërkoi nga unë, porse unë s’kisha asgjë në shtëpi përveç një hurme. Ajo e mori atë dhe ua ndau dy vajzave të saj, kurse vet nuk hëngri fare prej saj. Pastaj u çua dhe doli me bijat e saj. Pastaj hyri Pejgamberi (sal-lAllahu ‘alejhi ue sel-lem) dhe i tregova atij atë që ndodhi dhe ai tha:

إن الله قد أوجب لها بها الجنة وأعتقها بها من النار.

“Me të vërtetë Allahu me këtë ia ka obliguar asaj Xhenetin dhe e ka çliruar nga Zjarri.” Transmetuar nga Bukhari dhe Muslimi.

4 – Nderimi i tyre dhe të sjellurit me butësi dhe mëshirë me to: Nëse tek Pejgamberi (sal-lAllahu ‘alejhi ue sel-lem) hynte Fatimah, ai thoshte: “Mirësevjen bija ime.” Një ditë ai doli të falej me njerëzit

dhe mbante në krahë Umamen e cila ishte bija e bijës së tij, Zejnebes. Dhe kur ai binte në ruku e linte atë në tokë, e kur çohet e merrte prapë në krahë. Ndoshta nuk kishte kush të kujdesej për të prandaj ai pati frikë ta linte ose deshte që t’ua tregonte këtë veprim njerëzve e t’ua ligjëronte, që ata të lehtësoheshin nga udhëzimi i tij, lavdërimet dhe bekimet e Allahut qofshin mbi të.

Pejgamberi (*sal-lAllahu ‘alejhi ue sellem*) ishte nga njerëzit më të mëshirshëm me fëmijët në përgjithësi, qoftë me djemtë e qoftë me vajzat, i puthte, i përkëdhelte në kokë, bënte dua për ta dhe bënte shaka me ta, dhe tek kjo gjë ka shumë mirësi.

Sa më shumë që rritet vajza aq më shumë rritet nevoja e saj që të çmohet e të respektohet. Dhe nëse asaj i plotësohet kjo nevojë dhe ajo e ndjen se tek shtëpia e prindërve ka vlerë dhe pozitë, atëherë kjo do të jetë premisë e normalitetit, qetësisë dhe qëndrueshmërisë së shpirtit dhe gjendjes së saj. Por ama, nëse ajo përballet me nënçim dhe lihet pas dore dhe trajtohet vetëm me urdhëresa dhe ndalesa, i kërkohet të bëjë punë, atëherë tek ajo do të krijohet urrejtje për shtëpinë e saj dhe për familjen e saj, e ndoshta Shejtani i hedh pëshpëritje dhe ajo do të fillojë të gjejë dashurinë dhe ngrohtësinë që i kanë munguar por në rrugë të ndaluara të cilat do ta shpien drejt humnerës së thellë, fundin e të cilës e di vetëm Allahu.

5 – Mbajtja e drejtësisë mes asaj dhe vëllezërve dhe motrave të saj, ngase ndjenja e padrejtësisë dhe favorizimi i fëmijëve të tjerë më shumë se ajo do të mbjellë tek ajo urrejtjen ndaj prindërve dhe ligësi ndaj vëllezërve apo motrave që janë më të favorizuar se ajo. Prandaj, kijeni frikë Allahun dhe mbani drejtësi midis fëmijëve tuaj. Sa i përket shpenzimeve, shpenzoni në varësi të nevojave. Kurse sa i përket dhuratave, mashkullit i takon aq sa pjesa e dy femrave, e nëse u jepni në mënyrë të barabartë atëherë kjo është gjë e mirë.

6 - Të edukohet me edukatë Islame dhe të mësohet që t'i përmbahet Islamit që në vegjëli; të mësojë edukatën e të kërkuarit leje, edukatën e të ngrënit dhe të pirit, edukatën e veshjes, të mësojë sa të mundë Kur'anin dhe dhikrin që ka ardhur në Sheriat, të mësojë abdesin dhe namazin. Kur të mbushë shtatë vjeç të urdhërohet që të falë namazin, e po i mbushi dhjetë vjeç detyrohet që të falet. Nëqoftëse rritet në mirësi, ajo do të mësohet me të dhe do ta dojë gjithmonë dhe kështu do të jetë e lehtë për të që të kapet fort mbas mirësisë dhe të jetë e palëkundur.

7 - Të mësohet dhe të praktikohet me ato gjëra që do t'i duhen kur të kalojë më mbas në jetën martesore, siç janë normat e sjelljes me burrin, mbarëvajtja e shtëpisë, gatimi, pastrimi etj. Me të vërtetë, ka disa familje që i kanë neglizhuar këto aspekte, dhe kur vajza kalon më mbas në shtëpinë e burrit të saj ajo nuk ia ka idenë gatimit, si të ndezë zjarrin, si të rrijë me njerëzit e si të sillet me ta! E mundet që burri të mos durojë shumë dhe nxehet shpejt, e kështu menjëherë fillojnë telashet dhe çështja mundet të arrijë deri tek divorci.

8 - Të martohet sa më herët nëse arrin moshën e pjekurisë dhe i ka ardhur kërkesë nga dikush që ka fenë, besën dhe moralin e mirë dhe ajo është e kënaqur me të. Dhe me të vërtetë kjo është bamirësia më e madhe për të, ngaqë vonimi i martesës së vajzës është prej shkaqeve më të mëdha të devijimit nga Rruga e Drejtë, sidomos në kohën e sotme.

Dhe kur kujdestari i vajzës bën lehtësim në çështjen e martesës në aspektin e mehrit dhe të kërkesave të tjera, e gjithë kjo u jep kurajon atyre që duan të kërkojnë dorën e vajzës, pastaj mbas saj do t'u vijë rradha motrave të saj.

Pastaj, familja muslimane duhet të ketë kujdes nga vonimi i nikahut (martesës) së vajzës me argumentin se ajo duhet të mbarojë studimet apo se vajza është akoma e vogël apo për justifikime të tjera jo-serioze, ngase kjo gjë do të rezultojë me pasoja të këqija për shoqërinë.

9 – Të mbajë fort lidhjet me familjen dhe t’u bëjë vizita edhe pas martesës së saj, të interesohet për nevojat e tyre, të mundohet të zgjidhë problemet e tyre, si dhe të marrë pjesë në gëzimet dhe pikëllimet e tyre. Gjithashtu, familja duhet të ketë kujdes, sidomos nëna, që të mos ndërhyjë në jetën e vajzës së saj, ngase ndërhyrjet e tepërta të tyre në gjëra që s’u takojnë mund t’i japë fund jetës martesore të vajzës së tyre.



Masat mbrojtëse nga rreziqet e kësaj kohe

Ti e di shumë mirë o vëlla Musliman se me të vërtetë po jetojmë në një kohë kur fitnet janë të shumta, dhe rrugët e ç’thurjes e devijimit janë zbukuruar në këtë kohë si kurrë ndonjëherë më përpara. Dhe kjo thekson përgjegjësinë që ke mbi krye dhe kërkohet nga ty që të shtosh mundin në edukimin, këshillimin, udhëzimin dhe marrjen e masave për të qenë të sigurtë. Dhe më poshtë vijojnë shkurtimisht disa prej masave që duhet të ndërmerren për t’u ruajtur nga fitnet e sotme:

1 – Babai dhe nënaa duhet të jenë të rregullt dhe të kapur pas Fesë, sepse këto të dyja janë prej shkaqeve që Allahu t’i ruajë pasardhësit e tyre, sikurse ka thënë i Lartësuari në suren *el-Kehf*, në ndodhinë e Musait me Khidrin:

فَانْطَلَقَا حَتَّىٰ إِذَا أَتَيَا أَهْلَ قَرْيَةٍ اسْتَطْعَمَا أَهْلَهَا فَأَبَوْا أَنْ يُضَيِّفُوهُمَا فَوَجَدَا فِيهَا جِدَارًا يُرِيدُ أَنْ يَنْقَضَ فَأَقَامَهُ^ط قَالَ لَوْ شِئْتَ لَتَّخَذْتَ عَلَيْهِ أَجْرًا ﴿٧٧﴾

“Dhe që të dy vazhduan të ecin, derisa arritën në një fshat dhe u kërkuan banorëve të tij, që t’u jepnin për të ngrënë, por ata nuk i pranuan mysafirë. Aty ndeshën një mur që ishte duke u rrëzuar dhe ai (Khidri) e drejtoi. (Musai) tha: “Sikur të kishe dashur ti, mund të kërkoje shpërblim për këtë.””³

Dhe pas asaj, Khidri sqaroi arsyen pse e rregulloi murin pa marrë shpërblim për të:

³ El-Kehf, 77.

وَأَمَّا الْجِدَارُ فَكَانَ لِغُلَامَيْنِ يَتِيمَيْنِ فِي الْمَدِينَةِ وَكَانَ تَحْتَهُ كَنْزٌ لَهُمَا وَكَانَ أَبُوهُمَا صَالِحًا فَأَرَادَ رَبُّكَ أَنْ يَبْلُغَا أَشُدَّهُمَا وَيَسْتَخْرِجَا كَنْزَهُمَا رَحْمَةً مِّن رَّبِّكَ

“E, sa i përket murit, ai u takonte dy djelmoshave jetimë në qytet dhe, nën të gjendej një thesar i tyre. Babai i tyre kishte qenë njeri i mirë, prandaj Zoti yt dëshiroi që ata të arrinin moshën e pjekurisë e ta nxirrnin thesarin e tyre, si mëshirë nga Zoti yt.”⁴

Pra, i ruajti Allahu ata dy djelmosha ngaqë babai i tyre kishte qenë njeri i devotshëm.

2 – T’i kushtohet rëndësi duasë, ngase dua ja ka ndikim jashtëzakonisht të madh. Dhe kur prindërit i luten Allahut dhe i kërkojnë që t’i rregullojë fëmijët e tyre, kjo është një prej shkaqeve dhe portave të mirësisë. Nga fjalët më të bukura që kanë thënë Selefët është ajo që është transmetuar nga el-Fudajl Ibn ‘Ijjad, Imami i Haramit të Mekkes në kohën e tij: “O Allah, unë u mundova që ta edukoj birin tim ‘Aliun, por nuk mundem dot ta edukoj, andaj edukoje Ti për mua.”

Kështu, gjendja e djalit ndryshoi dhe ai u bë nga njerëzit më të devotshëm të kohës së tij dhe vdiq në namazin e Sabahut kur imami lexoi Fjalën e Allahut të Lartësuar:

وَلَوْ تَرَىٰ إِذْ وَقَفُوا عَلَى النَّارِ فَقَالُوا يَلَيْتَنَا نُرَدُّ

⁴ El-Kehf, 82.

“Sikur t’i shohësh ata kur të vihen para zjarrit, duke thënë: “Ah! Sikur të ktheheshim pas.””⁵ [Shiko Sijer E’alamin-Nubelaa`, 8/390]

Dhe vërtet, ne na ka mësuar Pejgamberi (sal-lAllahu ‘alejhi ue sel-lem) që të kërkojmë mbrojtjen e Allahun nga fitnet, e kështu duhet edhe fëmijët tanë të bëjnë dua dhe të mësojnë ato dua me të cilat Allahu u bën dobi. Kur u sprovua Jusufi (‘alejhis-selam) me fitnen e asaj gruas, tha:

رَبِّ السَّجْنِ أَحَبُّ إِلَيَّ مِمَّا يَدْعُونَنِي إِلَيْهِ ۖ وَإِلَّا تَصْرِفْ عَنِّي كَيْدَهُنَّ أَصْبُ إِلَيْهِنَّ وَأَكُن مِّنَ الْجَاهِلِينَ ﴿١٢﴾ فَاسْتَجَابَ لَهُ رَبُّهُ فَصَرَفَ عَنْهُ كَيْدَهُنَّ ۚ إِنَّهُ هُوَ السَّمِيعُ الْعَلِيمُ ﴿١٣﴾

“O Zoti im, burgu është më i dashur për mua se ajo ku po më shtyjnë ato. Nëse Ti nuk e largon prej meje dredhinë e tyre, unë do të prirem drejt atyre dhe do të bëhem nga ata injorantët. Dhe Zoti i Tij iu përgjigj lutjes dhe e largoi nga ai dredhinë e tyre. Me të vërtetë, Ai dëgjon dhe di çdo gjë.”⁶

Dhe Allahu i Përsosur nga çdo e metë shpjegoi se Ai iu përgjigj duasë së Jusufit sepse Ai dëgjon dhe di çdo gjë, në mënyrë që ta dijë besimtari se Jusufi iu lut Zotit të tij dhe Allahu e dinte sinjeritetin e tij, prandaj Allahu është afër dhe i përgjigjet lutjes.

3 – Vajzat duhet të rriten me udhëzimet dhe porositë e duhura, herë duke u folur në mënyrë direkte e herë në mënyrë indirekte, në varësi të situatës, ngase zemrat shkujdesen, prandaj ato duhet të

⁵ El-En’am, 27.

⁶ Jusuf, 33.

gjallërohen me këshillë dhe përkujtim. Dhe vërtet përkujtimi i bën dobi Besimtarëve.

4 – Vajzat duhen porositur që të zgjedhin për shoqe vajzat më të mira ngase shoqëria ka ndikim jashtëzakonisht të madh në sjellje, në mendime e në gjëra të tjera. Ka ardhur në hadith:

المرء على دين خليله فلينظر أحكم من يخال.

“Njeriu është në fenë e shoqut të tij, andaj le të shohë gjithëkush prej jush cilin ka marrë për shoq.”

5 – Vajza duhet mbajtur larg mjeteve të prishjes dhe degjenerimit, ngase shumica e kanaleve televizive dhe shumica e faqeve të internetit më shumë shkatërrojnë sesa ndërtojnë, më shumë dëmtojnë sesa japin dobi, më shumë prishin sesa përmirësojnë. Sa ndere e dinjitete kanë humbur e janë njollosur për shkak të tyre! Kurse siguria qëndron në distancimin nga të gjitha ato mjete. Asgjë nuk është e barazvlefshme me sigurinë. Nëse këto mjete gjenden në banesë, atëherë kryetari i familjes duhet të ketë merak se mos ato janë të hapura dhe anëtarët e familjes shikojnë ç’tu vijë për mbarë dhe hyjnë në internet kur të duan. Kështu, ata do t’i dëmtojnë tej mase vetet e tyre. E njëjta gjë vlen të thuhet edhe për aparatet celulare, sepse sot ato nuk janë thjesht mjete komunikimi por akoma më shumë; ato janë mjete inçizimi, fotografimi, filmimi. E sa të shumtë janë ata të cilët i përdorin ato për të shpërndarë dhe përhapur degjenerim!

6 – Kujdestari i vajzës duhet të jetë i përgjegjshëm dhe të mbajë mbi krye obligimin e përkujdesjes dhe këmbëngulës në përkujdesjen

ndaj vajzës dhe rregullimin e gjendjes së saj. Kurse neglizhimi dhe lëshimi pe është prej shkaqeve të rrëshqitjes së bijave. Andaj bëj detyrën tënde ashtu siç i ka hije burrit, mos e lejo familjen tënde që të zhvishet dhe të ekspozojë pjesët e trupit dhe zbukurimet e saj, të përzihet me meshkuj dhe njerëz që janë të huaj për të dhe të udhëtojnë pa mahrem, se me të vërtetë gratë marrin kurajo për t'i bërë këto gjëra atëherë kur shohin pavëmendshmëri dhe moskokëçarje nga ana e kujdestarëve të tyre.

7 – Të bëhet shumë, shumë kujdes nga ndarja dhe shpërbërja e unitetit familjar, ngase të shumta janë ato familje që ankohen sot për lidhjen e dobët midis anëtarëve të saj, ku gjithësecili shikon hesapin e tij; babai në një lëndinë, mama në një lëndinë tjetër, kurse fëmijët shohin punët e tyre. Dhe s'ka dyshim se kjo zbrazëti do të sjellë probleme të mëdha, të cilat zmadhohen pak nga pak me kalimin e kohës, derisa arrin fundin dhe ato shpërthejnë. Atëherë familja e merr vesh çfarë ndodhi, por, është tepër vonë.

8 – Vëlla Musliman, mos mendo se rreziku që i kanoset gruas, është rreziku i devijimit nga aspekti i moralit, duke rënë në gjëra të ndyra apo në drogë etj, porse ajo është e kërcënuar gjithashtu edhe nga një rrezik tjetër, i cili është rreziku ideologjik. Gruaja është e ekspozuar para këtij rreziku sepse ajo mund të bëhet pjesë e sekteve të shkatërruara, për të cilat na ka lajmëruar Pejgamberi (*sal-lAllahu ‘alejhi ue sel-lem*) se numri i tyre do të arrijë në shtatëdhjetë e dy. Sa e sa gra ka sot që kanë besimin e Khauarixhëve dhe ndikojnë tek burrat e tyre, fëmijët e tyre, tek nxënësit e tyre! Sa e sa gra ka sot që kanë përqaftuar akijden e Sufive dhe marrin pjesë në mexhliset dhe festimet e tyre, për të cilat Allahu nuk ka zbritur asnjë argument, si dhe shumë aspekte të tjera të cilat bien ndesh me Sunetin. Prandaj, është detyrë për të zotin e shtëpisë që të tregojë vëmendje të veçantë,

të ruhet dhe të ketë kujdes nga burimet që ushqejnë ideologjikisht zemrat dhe mendjet e anëtarëve të familjes së tij.

I them këto fjalë dhe e lus Allahun të udhëzojë dhe përmirësojë Muslimanët dhe Muslimanet dhe të rregullojë gjendjen e tyre, ashtu siç e lus Atë që t’u japë sukses bijave Muslimane në kapjen pas Fesë së tyre, t’i bëjë të palëkundura në menhexhin e vërtetë dhe t’i mbrojë nga fitnet devijuese, ato që janë të dukshme dhe ato që janë të fshehta.

Dhe lavdia i takon vetëm Allahut, Zotit të Gjithësisë.

Shkroi:

‘Ali Ibn Jahja el-Haddadij

14/10/1426 Hixhrij

<http://haddady.com/index.php>



Përktheu: Alban Malaj

‘Auali, Mekkeh

30 Rabij’ el-Euel 1433 Hixhrij / 22 Shkurt 2012 Miladij